


AUCKLAND PLAN 2050



Tirohanga Whānui | Hune 2018

NGĀ IHIRANGI

Ngā Ihirangi.....	2
He Mihi.....	4
Ko Tāmaki Makaurau Ināianeī	6
Tāmaki Makaurau – Ngā Tau E 30 E Tū Mai Nei.....	8
Te Toi Whenua Me Te Whai Wāhi.....	10
Te Tuakiri Māori Me Te Oranga.....	12
Ngā Kāinga Me Ngā Wāhi.....	14
Te Ikiiki Me Te Āhei.....	16
Te Taiao Me Te Tuku Ihotanga.....	18
Te Whai Wāhi Me Te Tōnuitanga.....	20
Rautaki Whakawhanake.....	22
Te Auaha I Te Mahere.....	30

© 2018 Te Kaunihera o Tāmaki Makaurau

Hūrae 2018

Te Tari mō te Mahere o Tāmaki Makaurau, te Rautaki me te Rangahau

Te Kaunihera o Tāmaki Makaurau (2018). Te Mahere o Tāmaki Makaurau 2050 – Tirohanga Whānui

ISBN 978-1-98-856424-1 (Mātātuhi)

ISBN 978-1-98-856425-8 (PDF)

I whakapūmautia te Mahere mō Tāmaki Makaurau 2050 e te Komiti Whakamahere o Te Kaunihera o Tamaki Makaurau i te 5 o Hune 2018.

Kei roto i tēnei tuhinga te tirohanga whānui o te Mahere mō Tāmaki Makaurau 2050 i te Hune 2018. Kia mōhio mai koe, ko te Mahere mō Tāmaki Makaurau 2050 he mahere matihiko, ā, ka whakahoungia i ētahi wā. Tirohia ki te pae tukutuku o te Mahere mō Tāmaki Makaurau ki, www.theaucklandplan.govt.nz mō te mahere katoa onaiānei.



HE MIHI

Tērā tō waka te hoea ake e koe i te moana o te Waitematā kia ū mai rā
ki te ākau i Ōkahu.

Ki reira, ka mihi ake ai ki ngā maunga here kōrero, ki ngā pari
whakarongo tai,
ki ngā awa tuku kiri o ōna manawhenua, ōna mana ā-iwi taketake mai,
tauīwi atu

E koro mā, e kui mā i te wāhi ngaro, ko Tāmaki Makaurau tā koutou i
whakarere iho ai,
ki ngā reanga whakaheke, ki ngā uri whakatupu – ki tō iti, ki tō rahi.
Tāmaki – makau a te rau, murau a te tini, wenerau a te mano.
Kāhore tō rite i te ao.

Tō ahureinga titi rawa ki ngā pūmanawa o mātou kua whakakāinga ki
roto i a koe.

Kua noho mai koe hei toka herenga i ō mātou manako katoa. Kua ūhia
nei mātou e koe ki te korowai o tō atawhai,
ki te āhuru o tō awahi,
ki te kuku rawa o tō manawa. He mea tūturu tonu whakairihia,
hei tāhuhu mō te rangi e tū iho nei,
hei whāriki mō te papa e takoto ake nei.
Kia kōpakina mātou e koe ki raro i te whakamarumarū o āu
Manaakitanga.

E te marae whakatutū puehu o te mano whāioio,
e rokohanga nei i ngā muna, te huna tonu i ō whāruarua i ngā hua e
taea te hauhake i ō māra kai,
i ngā rawa e āhei te kekerihia i ō pūkoru. Te mihia nei koe e mātou.

Tāmaki Makaurau, ko koe me tō kotahi i te ao nei, nōku te māringanui
kia mōhio ki a koe,
kia miria e te kakara o te hau pūangi e kawē nei i ō rongo.
Ka whītiki nei au i taku hope ki ngā pepehā o onamata, ki ōku
tūmanako mō āpōpō
me ōku whakaritenga kua tutuki mō te rā nei. Tāmaki Makaurau,
tukuna tō wairua kia rere.

Let your canoe carry you across the waters of the Waitematā
until you make landfall at Ōkahu.
There, to greet the mountains, repository of all that has been
said of this place,
there to greet the cliffs that have heard the ebb and flow of the
tides of time,
and the rivers that cleansed the forebears of all who came
those born of this land and the newcomers among us all.
To all who have passed into realms unseen, Auckland is the
legacy you leave to those who follow,
your descendants – the least, yet, greatest part of you all.
Auckland – beloved of hundreds, famed among the multitude,
envy of thousands.
You are unique in the world.

Your beauty is infused in the hearts and minds of those of us
who call you home.
You remain the rock upon which our dreams are built.
You have cloaked us in your care,
taken us into the safety of your embrace,
to the very soul of your existence.
It is only right that you are held in high esteem,
the solid ground on which all can stand.
You bestow your benevolence on us all.

The hive of industry you have become
motivates many to delve the undiscovered secrets of your realm,
the fruits that can still be harvested from your food stores
and the resources that lie fallow in your fields.
We thank you.

Auckland you stand alone in the world, it is my privilege to know you,
to be brushed by the gentle breeze that carries the fragrance of
all that is you.
And so I gird myself with the promises of yesteryear, my hopes for
tomorrow and my plans for today.
Auckland let your spirit soar.

KO TĀMAKI MAKĀURAU INĀIANEI

Ko te tikanga o Tāmaki Makaurau ko Tāmaki te makau o te tini. Ka whakaahua te ingoa i te ranea o ngā rawa whenua, ngā wāhi tirohanga rautaki, ngā ara tōanga waka me ngā mahinga kai tērā i kukume mai i te Māori i te tuatahi, i ētahi atu kaiwhakanoho i muri atu.

Neke atu i te 1.66 miriona ngā tāngata e noho ana i Tāmaki Makaurau. Hei ēnei tau e 30 e heke mai nei ka piki ake pea te taupori mā te 720,000 anō, ka mutu, ka tae pea ki te 2.4 miriona.

Ka arohaina a Tāmaki Makaurau e ngā tāngata nā te mea he tāone whai wāhi. E pīrangi ana rātou ki te whakapakeke i te whānau, me te tauaru i ngā tūmanakohanga ā-matawhaiaro, ā-pakihi, ā-umanga anō hoki ki konei.

Mā tō tātou taupori kanorau ā-mātāwaka, ā-ahurea e hihiri ana, e wātea ana a Tāmaki Makaurau hei wāhi noho.

E whakarato ana tō tātou taiao tūturu ātaahua i ngā whai wāhitanga tauoratanga, ā, e tino tautoko ana i te oranga pai te kounga mō ngā tāngata katoa o Tāmaki Makaurau. Ko te taiao tūturu te papa o tō tātou tuakiri me tō tātou oranga.

Ko Tāmaki Makaurau te tāone arumoni nui rawa atu o Aotearoa. Ka waihanga tata ki te 40 ōrau o te whakanaonga tapeke ki uta o te whenua nei, ā, nā tōna rahi e taea ana te whakawhanake pūnahanga me te kukume mai i ngā tāngata whai pūmanawa tauwhāiti ki te uruhi i te whanaketanga ohaoha. Kōwhiri ai te nuinga o ngā kaiheke ki te noho ki Tāmaki Makaurau nā te tino whānuitanga o ngā whai wāhitanga whiwhi mahi, arumoni anō hoki i roto i te tāone nei.

I Tāmaki Makaurau e tipu tonu ana, me whakarite tātou kia whiwhi hua ai ngā tāngata katoa o Tāmaki Makaurau i te tōnuitanga ā-pāpori, ā-ohaoha anō hoki e puta mai ai i te tupu, ā, kia ngā whai wāhitanga e pāhekoheko ai, e hākinakina ai ngā tāngata i te oranga hapori me ngā take tāone.



Ngā wero matua e toru kei te aroaro o Tāmaki Makaurau

E tautohu ana te Mahere mō Tāmaki Makaurau 2050 i ngā wero matua e toru me tutuki hei whakatinana i tā tātou e wawata ana mō Tāmaki Makaurau:

1. Te tupuranga taupori me ōna pānga

- Nā te nui me te tere o te tupuranga taupori e tupu haere tonu ana te tono mō te mokowā, te punahahanga, me ngā ratonga. Nā reira i pēhia nei ō tātou hapori, tō tātou taiao, te nui o ngā whare me ō tātou rori.
- He tino nui te haumi pūtea hei urupare, hei tautoko anō hoki i te tupuranga, ā, kāore e taea e tātou te whakawhirinaki anake ki aua mātāpuna pūtea o mua.

2. Te tiritiri i te tōnuitanga ki ngā tāngata katoa o Tāmaki Makaurau

- Kei te āhua o te tiritiri i te tōnuitanga o Tāmaki Makaurau te angitu o Tāmaki Makaurau.
- He tokomaha ngā tāngata nō Tāmaki Makaurau e taurikura ana, me te pai o te orange, engari kei reira hoki te kaha ngaromanga o ngā rawa ohaoha pāpori, ina koa i ētahi wāhi tauwhāiti.
- Arā ngā tauira rerekē o te moni whiwhi, te whiwhinga mahi, te hauora me te mātauranga puta noa i te whānuitanga o ngā rōpū pakeke me ngā mātāwaka.
- Nā te tino pikinga o te utu noho whare he tokoiti ake ngā tāngata o Tāmaki Makaurau e tae atu ana ki ngā taumata orange e taurikura ana.

3. Te whakaheke i te whakakino i te taiao

- E ahu mai ana te nuinga o te rerehua o Tāmaki Makaurau i tōna taiao.
- Ahakoa ngā waeture me te whakapau kaha, e aweawe tonutia ana te taiao o Tāmaki Makaurau e ngā whakataunga o mua, e te tupuranga me te whanaketanga tere, me ngā wero e maea mai ana pēnei i te panoni huarere.
- E haere tonu ana te pānga nui rawa o ētahi take tauwhāiti e rua ki te taiao: te whakawhanaketanga tāone, me ngā pānga o te panoni huarere.

Kua whakatakotoria e te Mahere mō Tāmaki Makaurau 2050 ngā ahunga e 20 me ngā wāhi arotahi e 37 tērā ka whakatutuki i aua werohanga puta noa i ngā tau e 30 e tū mai nei, ā, e ora ai ēnei putanga whānui e ono.



TĀMAKI MAKĀURAU – NGĀ TAU E 30 E TŪ MAI NEI

Ka pēhea te mahere e mahi ai

Ko tā te Mahere mō Tāmaki Makāurau 2050 he whakarato i te whakaahuatanga whānui o Tāmaki Makāurau, i te whakarāpopotonga o ngā wero matua e toru kei mua i tō tātou aroaro, me te whakatakoto i te ahunga hei whai mō te whakatutuki i aua wero puta noa i ēnei tau e 30 e tū mai nei. E whakaurua ana ngā uara ka awe i te āhua e mahi tahi ai tātou, ka tautohu i ngā whakahaere matua he nui ō rātou tūnga mō te hanga i tō tātou anamata tiritiri.

E ono ngā putanga i roto i te mahere, kua whakatakotoria ki te hoahoa e tauaro ana. Ka paheko ēnei putanga ki te Rautaki Whakawhanake ki te whakatinana i te momo tāonenui e hiahia ana e ngā tāngata o Tāmaki Makāurau.

E whakaatu ana te Rautaki Whakawhanake i te āhua e tupu ai, e panoni ai Tāmaki Makāurau i ēnei tau e 30 e tū mai nei. E komokomotia ana i roto ngā putanga e hiahia ana tātou ki te whakatutuki, tae atu ki ngā matapae tupuranga me ngā ture whakamahere i te Mahere Kotahitanga o Tāmaki Makāurau.

E arotahi ana tēnei pepa ki ngā take matua me ngā wero mō Tāmaki Makāurau i raro i ngā wāhi putanga e ono me te Rautaki Whakawhanake.

Ngā uara o Te Mahere mō Tāmaki Makāurau 2050

Kei roto i te Mahere mō Tāmaki Makāurau 2050 he uara e tūhonohono ana i a tātou, tētahi ki tētahi, ki tēnei wāhi hoki e kīa nei ko Tāmaki Makāurau. Anei:

Atawhai

Te mākohe me te manaakitanga

Kotahi

Te kaha e ahu mai ana i te kanorautanga

Auaha

Te wairua auaha, te tirohanga hou

Pono


Te ngākau tapatahi

Taonga tuku iho

Ngā whakatupuranga e heke

NGĀ PUTANGA

Ko tā te mahere e hiahia ai kia puta




**TE TOI WHENUA
ME TE WHAI
WĀHI**



**TE TUAKIRI
MĀORI ME TE
ORANGA**



**NGĀ KĀINGA
ME NGĀ WĀHI**



**TE IKIIKI ME
TE ĀHEI**



**TE TĀIAO ME TE
TUKU
IHOTANGA**



**TE WHAI WĀHI
ME TE
TŌNUITANGA**

RAUTAKI WHAKAWHANAKE


Te āhua e tupu ai, e panoni ai a
Tāmaki Makaurau puta noa i ngā
tau e 30 e heke mai nei, tae atu ki te
whakaraupapa i te tupuranga me te
whakawhanaketanga

NGĀ ĀHUNGA E 20

Me pēhea te whakatutuki i ngā putanga

NGĀ WĀHI AROTĀHI E 37

Me pēhea te whakatutuki i ēnei



TE TOI WHENUA ME TE WHAI WĀHI

Kia whai wāhi ngā tāngata katoa o Tāmaki Makaurau ki te porihanga, ka whiwhi whai wāhitanga, ka āhei ki te whanake ki ngā taumata ka taea e rātou.

He aha tēnei putanga – he aha i pēnei ai te hira?

Kei Tāmaki Makaurau e āta kitea ana te tupuranga tino tere me te panoni pāpori tere, ā, ka haere tonu ēnei.

He kanorau tō tātou taupori e ai ki te mātāwaka, te whenua whānau, te ahurea, te whakapono, ngā wheako ora, te tūnga o hapāpori, te ira tangata, te tuakiri ira tanga me te aronga hōkaka, te hauātanga, me te tauwāhi ahakoa i te taiwhenua, i te motu, i te tāone rānei.

E kawē mai ana tēnei kanorautanga i ngā rerekētanga maha e pā ana ki ngā uara me ngā tauoranga, ngā tono rawa me ngā ratonga, me ngā tūmanakohanga mō te whai wāhi ki ngā take tāone me te manapori.

Me āta kōkiri tātou kia whakarite i te matemate-ā-one me ngā wheako oranga takatika mō ngā tāngata katoa o Tāmaki. Me noho tuwhera tātou ki te ako me te uara i ngā rerekētanga, ki te mātau ki ō tātou hītori rerekē me te tiritiri i ēnei. Mā tērā e whakarite te noho tahi i runga i te wairua tōkeke, te pono me te whakaute tētahi i tētahi, me te mahi tahi a te tangata ki te hanga i te anamata ka tiritiria.

E kore e angitu a Tāmaki Makaurau ki te kore ngā tāngata katoa o Tāmaki Makaurau e rongō i te toi whenua, ki te kore rānei e whai wāhi ki te porihanga. He maha ngā ara ka whāia ki te whakatutuki i ēnei:

- te whakanui i te tuakiri Māori o Tāmaki Makaurau
- te āhukahuka, te matapopore, me te whakanui i ngā rerekētanga pāpori, ahurea hoki
- ngā mahi waihanga hapori
- te kaihautūtanga ā-rohe me te hanga whakatau.

Kia kitea tonutia ai a Tāmaki Makaurau hei wāhi noho, hei wāhi mahi e pīrangitia ai e te tangata, me whiwhi ngā tāngata katoa o Tāmaki Makaurau i te whāinga wāhi ki te eke panuku. Ko te tikanga nei, me whai i te ara ka whakarite kia rongō te katoa i te toi whenua, kia whai wāhi te katoa ki te pāpori.

Ko te tikanga anō hoki o tēnei, me whai i te ara tōkeke e taea ai e te katoa te whai wāhi ki te tōnuitanga o Tāmaki Makaurau.

Me pēhea te whakatutuki i tēnei putanga:

AHUNGA	WĀHI AROTAHI
<p>Ahunga 1 Whakaturia te toi whenua kia noho a Tāmaki Makaurau he tāonenui e whai wāhi ai te katoa</p> <p>Ahunga 2 Whakapaitia ake te hauora me te oranga mō ngā tāngata katoa o Tāmaki Makaurau mā te whakaiti i te kino me ngā whai wāhitanga kore ōrite</p>	<p>Wāhi Arotahi 1 Hangaia ngā whai wāhitanga haumaruru e tūtakitaki ai, e tūhonohono ai, e pāhekoheko ai, e hākinakina ai ngā tāngata i te oranga hapori me ngā take tāone</p> <p>Wāhi Arotahi 2 Whakaratoa ngā ratonga he māmā te āhei atu, me te pūnahanga pāpori¹, ahurea anō hoki, e urupare ana kia tutuki ai ngā hiahia kukune a te tangata</p> <p>Wāhi Arotahi 3 Tautokona me te mahi tahi me ngā hapori ki te whakawhanake i te whakamārohirohitanga kia puāwai ai i tēnei ao hurihuri</p> <p>Wāhi Arotahi 4 Ka whakamaioha, ka tautoko anō hoki, i te Tiriti o Waitangi hei tūāpapa kanorua mō Tāmaki Makaurau he wāhi e tūhonohono ai ngā ahurea</p> <p>Wāhi Arotahi 5 Āhukahukatia, ka uara me te whakanui i ngā rerekētanga o ngā tāngata o Tāmaki Makaurau hei mea kaha</p> <p>Wāhi Arotahi 6 Whakawhāitihia te haumi pūtea ki te whakakore i ngā kore ōritenga me te whakarato i ngā hapori kei reira te matea nui rawa.</p> <p>Wāhi Arotahi 7 Āhukahukatia te uara o ngā toi, te ahurea, te hākinakina me ngā mahi a te rēhia ki te oranga pai te kounga.</p>



1. Hei taura, ngā kura, pāka, ngā pokapū hauora ngā whare taonga me ngā whare toi



TE TUAKIRI MĀORI ME TE ORANGA

Mēnā e kaha puāwai ana te tuakiri Māori o Tāmaki Makaurau, koirā te rerekētanga o Tāmaki Makaurau i tēnei ao - ka whakakaha i te tōnuitanga mō te Māori, ā, e whiwhi hua ai ngā tāngata katoa o Tāmaki Makaurau.

He aha tēnei putanga – he aha i pēnei ai te hira?

Neke atu i te 1000 tau e noho ana te Māori, te iwi taketake o Aotearoa, i Tāmaki Makaurau.

E awahi ana a Tāmaki Makaurau i tōna ahurei kua puta mai i te Tiriti o Waitangi, kua auahatia e tōna hītori Māori me te tō rātou noho i konei. E āhukahuka ana te Tiriti i te rangatiratanga o ngā hapū me ngā iwi o Tāmaki Makaurau, me te paihere wehe kore i waenga i ngā tāngata o Tāmaki Makaurau me te tāone o Tāmaki Makaurau.

He kanorau, he hihiri te taupori Māori o Tāmaki Makaurau i tēnei rā. Tata ki te 12 ōrau o te taupori o Tāmaki Makaurau he Māori, koia kei te takiwā o te 160,000 ngā tāngata. Neke atu i te haurua kei raro i te 25 tau, ā, tata ki te kotahi hautoru kei raro i te 15 tau.

Ko ngā Māori kei Tāmaki Makaurau e noho ana:

- nō ngā hapū me ngā iwi o Tāmaki Makaurau, e mōhiotia ana hei mana whenua, tērā rānei
- ko ērā kāore e whai hononga ana ki te kāhui mana whenua o Tāmaki Makaurau, e mōhiotia ana hei mātāwaka.

E hira tonu ana te Māori ki te angitu o Tāmaki Makaurau, ā, ka whakatutukihia ngā putanga angitu ina hangaia rawatia e tātou ngā whai wāhitanga:

- mō te tino rangatiratanga o te Māori me te whakanui i tēnei
- mō ngā mahi tahi a te Māori me ētahi atu
- mō te komokomo i ngā uara Māori ki ngā mahi whakamahere, ngā mahi whakatau me te whakapuaki.

Mā ngā kaha me ngā takoha ka mauria mai e Ngāi Māori ki Tāmaki Makaurau e whakatenatenatia te tupu me te haere whakamua o te oranga ā-pāpori, ā-ahurea, ā-oahaoha, ā-taiao o te Māori.

Me pēhea te whakatutuki i tēnei putanga:

AHUNGA	WĀHI AROTAHI
<p>Ahunga 1 Kōkiritia te oranga Māori</p> <p>Ahunga 2 Whakatokona te angitu, tirohanga hou me te hinonga o te Māori,</p> <p>Ahunga 3 Āhukahukatia me te whakarato i ngā putanga mō te Tiriti o Waitangi</p> <p>Ahunga 4 Whakakite whānuitia te tuakiri Māori me te ahurea hihiri Māori o Tāmaki Makaurau</p>	<p>Wāhi Arotahi 1 Whakaeangia ngā hiahia, ka tautoko i ngā tūmanakohanga o ngā tamariki me ō rātou whānau</p> <p>Wāhi Arotahi 2 Tuku haumitanga ki ngā marae kia noho toitū tonu me te taurikura</p> <p>Wāhi Arotahi 3 Whakapakaritia te whai wāhitanga a te rangatahi ki ngā putanga o te kaihautūtanga, te mātauranga me te whakawhiwhinga mahi</p> <p>Wāhi Arotahi 4 Whakatupuria ngā rawa Māori whakawhiti whakatupuranga</p> <p>Wāhi Arotahi 5 Kōkiritia te hautūtanga me te hanga whakatau o te rangatiratanga o te mana whenua, me te whakarato motika tuku iho</p> <p>Wāhi Arotahi 6 Whakanuitia te ahurea Māori me te tautoko i te kōrero i te reo Māori kia puāwai</p> <p>Wāhi Arotahi 7 Whakaaturia te mātauranga mana whenua me ngā mātāpono hoahoa Māori huri noa Tāmaki Makaurau</p>





NGĀ KĀINGA ME NGĀ WĀHI

Kia noho ngā tāngata o Tāmaki Makaurau i roto i ngā whare haumarū, hauora, ehara i te nui rawa te utu, ā, ka whai wāhi ki te whānuitanga o ngā wāhi tūmatanui e wātea ana ki te katoa.

He aha tēnei putanga – he aha i pēnei ai te hira?

Me rautaki ngā whakaaro o ngā tāngata o Tāmaki Makaurau ki te āhua e whakarato ai te pūnaha whare noho i ngā whare haumarū, hauora, ehara i te nui rawa te utu, mō te katoa o ōna tāngata.

Kāore te pūnaha whare noho e mahi pai ana mō te nuinga o ngā tāngata o Tāmaki Makaurau. I tēnei wā tonu kei Tāmaki Makaurau tētahi mākete hokohoko whare e nui ake atu ai te utu hoko whare i tō te nuinga huri noa i te ao. I tua atu, nui ake te moni ka whakapaua e ngā tāngata o Tāmaki Makaurau ki ngā whare, ahakoa e hoko ana, e rēti ana rānei, i tō te nuinga o ērā atu tāngata o Aotearoa.

Nā te piki o te utu mō te hoko, mō te rēti whare rānei, i noho ai ētahi tāngata ki ngā whare kino. Nā reira e piki haere ana ngā maiki ko te ahotea e pā ana ki te whare noho te take, ā, kua āta piki haere tonu te tokomaha e noho kāinga kore ana.

Mō ētahi atu, he itiiti noa ngā kōwhiringa whare, ā, e noho tawhiti atu rātou i ngā mahi, i ngā kura, i ngā whakaurunga i te itiiti o ngā kōwhiringa utu tika.

He maha tonu ngā take ka pā ki te maha o ngā kāinga e hanga ana mātou, ki te tere o te hanga, ki te tūmomo e hangaia ana, me te utu mō ēnei. Ko te āhua e whakariterite ana i te wharatonga whenua, te utu ka utaina mō te whakawhanake whenua, te rahi me te kaha o te rāngai hanga whare ētahi āhuetanga o te pūnaha whare noho ka awe i te rahi me utu mō te whare kua oti te hanga.

Me arotake hoki ētahi atu āhuetanga o te pūnaha whare noho. E whai pānga ana te kāwanatanga ā-rohe me te kāwanatanga matua, te hunga whakawhanake, ngā kaihangā, ngā kaupuri whare, ngā kaihaumi, ngā kairēti me ngā whakahaere kāwanatanga kore ki te pūnaha whare noho, ā, ka āhei te katoa te kimi haere i ngā rongoā atamai ake.

He nui ake te hira o te whai whare noho tonu ināianei i tō ngā wā o mua. Me āta whakarite kia kaua te rēti whare e kitea hei kōwhiringa tuarua ki tō te pupuri whare hei rangatira, ā, kia pai ake ai te pūnaha rēti whare ki ngā tāngata o Tāmaki Makaurau. Ka whakaurua te whakarite kia āta hoahoa i ngā whare rēti me te tautoko i ngā putanga hauora.

Ka hiahia te whakatika i ēnei i ngā whakaaro rerekē me ngā ara rerekē.

Ko ngā wāhi me ngā whaitua o Tāmaki Makaurau ngā wāhi e mahi ana, e noho ana, e tākaro ana tātou. Ko ngā wāhi tūmatanui pea ko ngā papa tākaro, ngā papa hākinakina, ngā tiriti me ngā huarahi, ngā pokapū tāone me ngā marae ātea, ngā papa hokohoko me ngā mokowā i waenga whare.


Ina tupu te taupori o Tāmaki Makaurau me mātua whakarato kia nui rawa ngā wāhi tūmatanui hei whakatutuki i ngā hiahia o ngā kainoho. Me kī, he toronga ēnei ki ō tātou whare, ki te āhua e noho ai tātou, ka mutu, me hangore te hoahoa kia arotau ai ki ngā tāngata katoa ahakoa te pakeke me te āheinga o rātou e whakamahi ana i ēnei.

Ina whakawhāitia te arotahi ki te wāhi, ka rerekē ngā mahi ka puta. Ka whai wāhi ki te hanga whare te mōhiotanga ka whakatairanga ō tātou whare i te oranga, ā, e tautoko ana i tō tātou āhua noho.

Me pēhea te whakatutuki i tēnei putanga:

AHUNGA	WĀHI AROTAHI
<p>Ahunga 1 Whakawhanaketia he tāone kiato, pai te kounga, hei whakaea i te tupuranga o Tāmaki Makaurau</p> <p>Ahunga 2 Whakaterea ake te hanga whare ka whakatutuki i ngā hiahia me ngā manakohanga hurihuri haere o ngā tāngata o Tāmaki Makaurau</p> <p>Ahunga 3 Me neke ki tētahi pūnaha whare noho ka whakarite i ngā whare haumarū, ehara i te nui rawa te utu, mā te katoa.</p> <p>Ahunga 4 Whakaratoa kia nui ngā wāhi tūmatanui me ngā whaitua i te tāonenui e tuwhera ana ki te katoa, e taea ana, ā, e whaihua ana</p>	<p>Wāhi Arotahi 1 Whakaterea ake te whakawhanaketanga, pai te kounga, ka whakapai ake i ngā kōwhiringa whare noho</p> <p>Wāhi Arotahi 2 Whakakahangia te whai whare noho tonu, ka whakawhānui i te whānuitanga o ngā momo whai whare, ina koa mō ērā whai matea nui rawa.</p> <p>Wāhi Arotahi 3 Whakapaitia ake te kounga o ngā whare kua hanga kētia, ina koa ngā whare rēti</p> <p>Wāhi Arotahi 4 Me haumi, ka tautoko i ngā Māori kia ea ai ō rātou wawata whare noho tauwhāiti</p> <p>Wāhi Arotahi 5 Hangaia ngā wāhi tāone mō anamata</p>





TE IKIIKI ME TE ĀHEI

Ka māmā ake ki ngā tāngata katoa o Tāmaki Makaurau te tae atu ki ngā wāhi e hiahia ana i runga i te māmā, te haumaruru me te utu ngāwari anō hoki.

He aha tēnei putanga – he aha i pēnei ai te hira?

Mō ō tātou oranga angitu, pārekareka anō hoki, he mea waiwai ki a tātou kia māmā, kia haumaruru, kia utu ngāwari anō hoki te tae ki ngā wāhi e tino hira ana ki te tangata pēnei i te mahi, te kura, ngā hoa, te hākinakina me te ratonga hauora. E tutuki ai tēnei, me whai ara tōtika ngā tāngata mō te neke tāngata, rawa me ngā ratonga i roto, whakawhiti rānei i Tāmaki Makaurau, puta noa i Aotearoa me tāwāhi.

Kia noho a Tāmaki Makaurau hei tāonenui e māmā ana te haere i roto, me whakarite kia taea e ngā tāngata katoa ahakoa te pakeke me te kaha neke te mahi i ngā mahi o ia rā me te haere i tētahi wāhi ki tētahi atu i runga i te māmā, te utu ngāwari me te haumaruru.

He mea matua tō tātou pūnaha ikiiki mō te whakarite kia māmā te haere i roto i te tāone, ā, kia whai hua tātou katoa i tōna tupuranga. Ahakoa ngā whakapainga nunui i ēnei tau 20 kua hipa, nā te iti o te haumi pūtea mai rā anō, me te tere o te tupu taupori, he nui ngā wero kei mua i a tātou.

Nā ngā whakatau o mua i huri ai a Tāmaki Makaurau hei tāone āhua iti te kiato, e noho ai te whai motokā hei kōwhiringa whaitake anake mō te nuinga o ngā haerenga. Nā te tupu haere tonu o te taupori o Tāmaki Makaurau me te whakawhāiti i ngā wāhi mahi ki ētahi wāhi matua ruarua nei i pā kinotia ai te pūnaha ikiiki e aro ana ki te motokā.

Ko te whiwhi ki te haumi pūtea nui ake i ngā tau tekau e rua kua pahure ake nei kua tata oti te whatunga huanui matua, ā, kua tīmata te whatunga whakawhiti tere. I ēnei tau nei, kua tīmata tātou ki te whakawhanake i te whatunga eke paihikara haumaruru.

Heoi anō, ko te whakareretanga o ngā whakatau o mua kei te rangona tonutia i ēnei rā. He iti noa ngā kōwhiringa ikiiki e wātea ana ki ngā tāngata e noho ana ki ngā wāhi maha o Tāmaki Makaurau, ina he wāhi matua e whakawhāiti waka ana, e popoke ana i te nuinga o ngā rori matua.

Kua whakawhanaketia, kua whakaaetia anō hoki, e te Kaunihera o Tāmaki Makaurau me te kāwanatanga matua tētahi ara rautaki hei whakatutuki i ēnei wero. Ko te Kaupapa Tīaroaro Ikiiki Tāmaki Makaurau tēnei. Ka whakakaha tēnei ara i te hira kia pai ake te whakamahi i ngā whatunga o nāianei, te heipū i te haumi pūtea ki ngā wero tino nui me te āta arotahi ki te whakaaweawe i te tono haere.


Mā te whiwhi pūtea nui ake, i taea ai e te Tāke Kora Ā-Rohe, ka whakaahei ai te te whakatere ake i te ahu whakamua ki te whakapai ake i te ikiiki me te māmā haere i roto i te tāone. Me whakahāngai taua pūtea ki te matea, kua ki te momo ikiiki, ā, ko te utu o ngā kaupapa me whakariterite tuku pūtea e tōkeke ana me te ōrite mai i te kāwanatanga matua, te Kaunihera o Tāmaki Makaurau me te rāngai tūmataiti.

Hei whakamutunga, he mea hira kia hangore ō tātou mahere, ā, e taea ai te urutau haere ake nei. Ka kitea he whakarerekētanga tere i roto i te rāngai ikiiki, arā ngā hangarau e whakawhanake ana. He mea waiwai, kia urutau rawa ka taea ngā mahere me te pūnahahanga ikiiki e hanga ana tātou ki ngā mea tūpono noa ā muri ake.

Me pēhea te whakatutuki i tēnei putanga:

AHUNGA	WĀHI AROTAHI
<p>Ahunga 1 Kia pai ake te tūhonohono ai i ngā tāngata, ngā tauwāhi ngā rawa me ngā ratonga</p> <p>Ahunga 2 Whakanuia ake ngā kōwhiringa haere tūturu kia hauora, kia hihiri, kia tōkeke a Tāmaki Makaurau</p> <p>Ahunga 3 Whakamōrahitia te haumaruru me te tiaki taiao</p>	<p>Wāhi Arotahi 1 Kia pai ake te whakamahi i ngā whatunga ikiiki o nāiane</p> <p>Wāhi Arotahi 2 Whakawhāitihia ngā haumitanga ikiiki hou ki ngā wero tino nui</p> <p>Wāhi Arotahi 3 Whakamōrahitia ngā hua o te hangarau ikiiki</p> <p>Wāhi Arotahi 4 Whakarite kia noho te hīkoi, te eke paihikara me te ikiiki tūmatanui hei kōwhiringa manako ki te tokomaha ake o ngā tāngata o Tāmaki Makaurau</p> <p>Wāhi Arotahi 5 Kia pai ake te komokomo i te whakamahi whenua me ngā ikiiki</p> <p>Wāhi Arotahi 6 Me neke ki te whatunga ikiiki haumaruru, kāore e pāngia e te aituā me ngā wharanga nui</p> <p>Wāhi Arotahi 7 Whakawhanakehia he pūnaha ikiiki ukauka, taikaha tonu</p>





TE TĀIAO ME TE TUKU IHOTANGA

Ka tohu, ka tiaki, ka rauhi ngā tāngata o Tāmaki Makaurau i te taiao tūturu hei tuku ihotanga ahurea tiritiri¹, mō tōna uara ake, mō te painga hoki o ngā whakatupuranga o naiane, o muri atu hoki.

He aha tēnei putanga – he aha i pēnei ai te hira?

Ko te taiao tūturu te papa o tō tātou oranga. Ko tāna he toko me te whakahehi i ngā āhuetanga katoa o tō tātou porihanga, ohaoha me te ahurea. He wāhanga pūmau te taiao o te tuakiri me te toi whenua o ngā tāngata o Tāmaki Makaurau. E pā ana ki tō tātou hauora me te oranga, ka whakarato i te hau mā hei whakahā me te wai māori hei inu.

I tua atu i te toko i tōna iwi, he kāinga a Tāmaki Makaurau mō te maha o ngā pūnaha hauropi motuhake, ā, he waiwai ki te toiora o ngā kararehe kūwao me ngā momo mai i ngā wāhi rerekē o te ao.

He wāhanga te taiao tūturu nō te tuku ihotanga tiritiri o Tāmaki Makaurau – arā, tō tātou tuku ihotanga tōpū o te hau, te whenua me te wai, te kanorau koiroa, ngā horonuku hira, me ngā āhuetanga hītori. Ko te taiao tūturu me tō tātou tuku ihotanga kotahi he punga mō te matemate-ā-one o ngā hapori ki ō rātou ake wāhi.

He takohanga matatini, waiwai anō hoki ki ngā tāngata katoa o Tāmaki Makaurau te tohu me te whakahaere i ngā taiao tūturu kanorau o Tāmaki Makaurau.

Ko te tino matatini kei te horopaki o te taupori tupu tonu, me ngā whakaritenga o ngā mahi arumoni, ahuhenua, ahumahi hoki e whai wāhi ana ki tō tātou ohaoha.

Ahakoā ngā mahi o mua ki te tiaki me te whakarei i te taiao, kua pā kinotia e ngā mahi a te tangata. E haere tonu ana taua pānga kino nā¹:

- ngā mutunga iho o ngā whakatau o mua
- te kore e taea e te pūnahanga te tū pakari i roto i ēnei pēhanga o naiane
- ngā whakatau tauoranga o ia rā e mahia ana e ngā tāngata.


Arā hoki he raru hou hei whakatutuki mā te tangata. He wāhanga ngā wā pūāhuru rawa, ngā wā tauraki me ngā āwhā pārūrū o tō tātou oranga. Heoi anō, tērā tonu pea ka kino ake ā muri ake ngā pānga o te panoni huarere e kite wheako ana tātou i tēnei wā, ā, ka puta ngā pānga matua, wā roa hoki ki tō tātou āhua noho.

Me whakapau kaha tātou ki te whakaiti me te whakaheke i aua tumatuma, me te whakamōkito i ngā pānga ki ngā tāngata me te tuku ihotanga ahurea o ngā tāngata o Tāmaki Makaurau.


1. Ngā tikanga, ritenga, wāhi, mea, whakaputanga toi, ngā uara, ngā aha atu he mea tuku iho mai i tētahi whakatupuranga ki tētahi anō.

Me pēhea te whakatutuki i tēnei putanga:

AHUNGA	WĀHI AROTAHI
<p>Ahunga 1 Me whakarite kia uaratia, kia tiakina te taiao tūturu me te tuku ihotanga o Tāmaki Mākaurau</p> <p>Ahunga 2 Me whakahāngai i te tirohanga Māori ki te manaaki me te tiaki i tō tātou taiao tūturu tuku iho</p> <p>Ahunga 3 Whakamahia te tupuranga me te whanaketanga o Tāmaki Makaurau ki te tiaki me te whakarei i te taiao tūturu</p> <p>Ahunga 4 Me whakarite i te toitū o ngā pūnahahanga o Tāmaki Makaurau ki tua</p>	<p>Wāhi Arotahi 1 Whakatenatenatia ngā tāngata katoa o Tāmaki Makaurau ki te tiaki i te taiao tūturu me te hanga kōwhiringa toitū</p> <p>Wāhi Arotahi 2 Arotahi ki te whakaora i ngā taiao ka tupu ana a Tāmaki Makaurau</p> <p>Wāhi Arotahi 3 Me āta whai whakaaro ki ngā pānga o te tupuranga o mua me tērā kei te haere mai</p> <p>Wāhi Arotahi 4 Tiakina ngā taiao tūturu hira o Tāmaki Makaurau¹ me ngā wāhi tuku ihotanga ahurea i te pā kinotanga</p> <p>Wāhi Arotahi 5 Me urutau ki te wā o muri ake e rerekē ai te āhei ki te wai</p> <p>Wāhi Arotahi 6 Whakamahia ngā pūnahahanga kākārīki² kia nui ake te ukauka, ngā penapena utu mō te wā roa, me ngā putanga taiao papai</p>



1. Ngā wāhi kei reira ngā uara taketake ā-hauropi, ā-hākinakina, ā-ahurea rānei, hei taurira, te Pae Maunga o Waitākere, maunga, me ngā pāka ā-rohe.
2. Hei taurira, he tuanui ora, he māra ua, he ara tukunoa rānei.



TE WHAI WĀHI ME TE TŌNUITANGA

Me tāone taurikura a Tāmaki Makaurau me ngā whai wāhitanga nunui, ā, ka whakarato i te oranga pai ake ki te katoa.

He aha tēnei putanga – he aha i pēnei ai te hira?

Me hihiri tonu, me whai tonu i ngā ara hou te ohaoha o Tāmaki Makaurau. He mea tino nui tēnei i tēnei wā o ngā panoni hangarau tere tonu.

He waiwai anō hoki te tūhonotanga ki tāwāhi ki te ohaoha me te angitu o Tāmaki Makaurau. Me kawē atu i ngā hua me ngā ratonga ki ngā māketē puta noa i te ao i te wā tika, i runga hoki i te toitūtanga.

I ēnei tau tekau kua pahure ake e neke atu ana te kaha ohaoha ā-ao ki te tōnuitanga piki haere o Āhia. Mā konei ka kaha ake te āhei o Tāmaki Makaurau ki te tino whiwhi hua i tōna tauwāhi rautaki i te ao.

Arā hoki te pūmanawa torohū nunui kei roto i te nui haere o te rangatahi e noho ana i Tāmaki Makaurau me mahi hei kaihanganga auaha, hei rakahinonga ā muri atu i roto i te ohaoha.

E whakatōhenehene kētia ana ngā tauira pakihi, ngā whai wāhitanga mahi, me nga whanonga kiritaki e te hangarau. E pēnei ana te nui rawa o te panoni ka matapaetia mō āpōpō, e kīia kētia ana ko te tukipoto ahumahi tuawhā. Ka haere tonu taua tukipoto ki te panoni i te whai wāhitanga ki te mahi me te whaihuatanga.

Ka pāngia ngā ahumahi maha e te nui me te tere o te panoni mā ngā ara rerekē, i ngā tere rerekē anō hoki. Ka whakarato te tirohanga hou i roto i ngā hinonga ahakoa he aha te rahi i te whakamārohihitanga ki a Tāmaki Makaurau ki te urutau i roto i te ao e tere hurihuri ana.

Ka whai hua pai, hua kino hoki ngā panoni ki ngā tāngata me ngā whakahaere, i ētahi mahi hou e hangaia ana, i ētahi atu mahi o nāianei e ngaro ana. Kia noho takatū ngā tāngata o Tāmaki Makaurau ki aua panoni, me whakawhanake whai wāhitanga whakangungu mō ngā rōpū pakeke katoa. Me tautoko rawa ngā whai wāhitanga mahi e ngā whatunga ikiiki, matihiko papai hoki.

Kia whiwhi ai i ngā pūkenga e hiahiatia mō āpōpō me mahi ngātahi te katoa ki te whakarato i te whakawhanaketanga pūkenga i ngā wāhi me whai tirohanga hou, pēnei i ngā rāngai auaha me te hangarau mōhiohio. Me whakarato hoki i ngā tāngata whai pūkenga ki ngā wāhi mahi e hiahiatia ai ēnei pēnei i te rāngai hanga whare me ngā ratonga tūmatanui matua pēnei i te mahi tapuhi me te mahi whakaako.

Me panoni haere te ahurea me ngā ritenga hei whakarite kia wātea ngā whai wāhitanga ako, mai i te kōhungahungatanga ki te pēperekōutanga, kia noho ai te ako tūroa he āhuatanga noa. Mā tēnei e whakarato ngā pūkenga ora e hiahia ana ngā tāngata mō tō rātou oranga kia puāwai ai i roto i ō rātou whānau, hapori, mahi hoki.

Me pēhea te whakatutuki i tēnei putanga:

AHUNGA

Ahunga 1

Hangaia ngā āhuatanga e noho toitū ana te ohaoha mā te tirohanga hou, te tupuranga o ngā mahi, me ngā whakaputaranga nui ake

Ahunga 2

Kumea mai ngā tāngata whai pūkenga me ngā pūmanawa, ngā haumi hoki, ka pupuri i ēnei

Ahunga 3

Whakawhanakehia ngā pūkenga me ngā pūmanawa mō te āhua panoni o ngā mahi, mō te paetae tūroa tonu hoki.

WĀHI AROTAHI

Wāhi Arotahi 1

Whakamahia ngā hangarau e maea ana, ka whakarite i te āheinga ōrite ki ngā raraunga matihiko me ngā ratonga matihiko e tino pai rawa ana

Wāhi Arotahi 2

Whakarite kia tautokona ngā pakihi, ngā tirohanga hou me te tupuranga o te whakaputaranga ki ngā waeture, ngā mahi whakamahere me ētahi atu āhuatanga

Wāhi Arotahi 3


Whakanuia ake te hunga Māori whai mahi, ka tautoko i ngā pakihi Māori me ngā whakahaere ā-iwi ki te āta whai wāhi ki te ohaoha o Tāmaki Makaurau

Wāhi Arotahi 4

Whakapakaritia a Tāmaki Makaurau kia taea ai te tautoko i te tupuranga o ngā hokohoko ki tāwāhi.

Wāhi Arotahi 5

Whakapikia ngā paetae mātauranga, te ako tūroa tonu me te whakangungu, me te aro tonu ki ērā he nui rawa ngā matea



RAUTAKI WHAKAWHANAKE

He aha te Rautaki Whakawhanake?

Ko tā te Rautaki Whakawhanake he whakatakoto i te āhua e tupu ai, e panoni ai a Tāmaki Makaurau i ēnei tau e 30 e tū mai nei kia noho hei wāhi e arohaina ana e ngā tāngata o Tāmaki Makaurau, hei wāhi hoki e whakahihī ai rātou, he wāhi e pīrangī ana rātou ki te noho, ki te hoki mai, ā, he wāhi e pīrangī ana ētahi atu ki te toro, neke mai, haumi pūtea rānei.

E noho ana tata ki te 1.66 miriona tāngata i Tāmaki Makaurau. Hei ēnei tau e 30 e heke mai nei ka piki ake pea tēnei tapeke mā te 720,000 anō, ka mutu, ka tae pea ki te 2.4 miriona. Ko te tikanga o tēnei, e hiahia ana ētahi atu whare 313,000, me ngā mahi anō tae atu ki te 263,000 te maha.

He mea hira te tupuranga pēnei, ā, me mahi tahi tātou, me whakarite hoki kia mārāma tātou ki hea, āhea hoki, me whakarite me te tautiaki i te haumi ki ngā mahi whakamahere me ngā pūnahanga.

Ka whakarato te Rautaki Whakawhanake i te ahunga rautaki mō nāianei, mō ngā wāhi hoki e tutuki ai te tupuranga mō te ora o te mahere. Ka tū hoki hei Rautaki Whakanaketanga Anamata mō Tāmaki Makaurau he mea here i raro i te Tauākī Kaupapa Here Ā-Motu mō te Kahapupuri Whakawhanaketanga Wāhi Tāone 2016.

He aha te āhua o Tamaki Makaurau ki anamata?

Ka tino rerekē te āhua o Tāmaki Makaurau ā te paunga o ngā tau e 30. Kei Tāmaki Makaurau te nui o te whakawhanake houtanga me te whakawhanaketanga i roto i ngā wāhi kua whakawhanake kētia; me ngā hapori hou i roto i ngā wāhi tāone o āpōpō.

Ka puta he tupuranga iti, tāpiri hoki, i ngā wāhi tuawhenua i waho i te tāonenui.

He tauira pona-maha

Hei ēnei tau e 30 e tū mai nei ka ahu whakamau a Tāmaki Makaurau ki tētahi tauira pona-maha i roto anō i te tāonenui.

Ka noho tonu te pokapū tāonenui hei wāhi mō ngā mahi pakihī, tāpoi, mātauranga, ahurea, whakahaere tāone hoki. Ka whai hira tonu hei pokapū mō ngā whare noho. Engari ehara i te pokapū matua anake o Tāmaki Makaurau.

Ko Albany, Westgate me Manukau, tae atu ki ngā arawai, he pona e waiwai ana mō te tupu huri noa te takiwā. te whānuitanga o ngā mahi pakihī me te whakawhiwhi mahi, mō ngā mahi whakahaere tāone me ngā kōwhiringa whare noho. Ka ngongo ēnei pona i te kaha tupuranga ki te raki, te raki-mā-uru me te tonga, ka whakapai ake i reira te whakawhiwhi mahi, ā, ka tūhonoa ēnei mā te whānuitanga o ngā hononga ikiiki tōtika.

Waihoki, e mahi ana ngā tāone āpiti o Warkworth me Pukekohe hei pona taiwhenua e whakarato ana ki ngā hapori taiwhenua huri noa. Ka tūhonoa ki te tāonenui o Tāmaki Makaurau mā ngā huanui matua, ā, mō Pukekohe, mā te tereina, ā, ka tautoko i te tupuranga nui o ngā pakihī me ngā kāinga noho.

Ka pēhea tātou e tupu ai, e panoni ai?

E whakaahua ana te Rautaki Whakawhanake i ngā āhua matua e whā e tupu ai, e panoni ai a Tāmaki Makaurau i ēnei tau e 30 e heke mai nei:

1. Ka tupu mātou mā te whakawhanake houtanga me te whakawhanake anō i ngā wāhi kua whakawhanake kētia

Mā Tāmaki Makaurau e whai te ara pai hei whakarite i te kiato o te tupuranga me te whakawhanaketanga.

Ko te tikanga nei, ka whakawhāitihia te whakawhanaketanga o muri ki ngā wāhi o nāianei me ngā wāhi hou i roto tonu i te rohe o Tāmaki Makaurau, me te whakatiki i te rohanga atu ki roto i te taiwhenua huri noa.

Ā te tau 2050, kua puta mai te nuinga o taua tupuranga i roto i te rohe ake o te tāonenui, ina koa i roto, huri rauna rānei i:

- te pōkapū tāone
- ngā pona o Albany, Westgate me Manukau
- ngā wāhi kua tautuhia mō te whakawhanaketanga
- ngā wāhi ā-tāone ā muri atu.

Kua tutuki te ara whakarite i te kiato o te whakawhanaketanga o muri atu mā:

- te āta whakatūturu i te tupuranga puta noa i Tāmaki Makaurau
- te tāmāu i te hoahoa pai ki ngā whakawhanaketanga katoa
- te whakaraupapa i ngā mea ka tutuki
- te whakahāngai i te whakaratonga pūnahahanga ki te whakawhanaketanga
- te tautoko i te whakaputanga taiwhenua

Ngā wāhi whakawhanake

Ka tūpono mai te tupuranga āpiti puta noa i te tāonenui o Tāmaki Makaurau, ā, ka taea tēnei te whakariterite mā te raukaha pūnahahanga kei reira kē.

Heoi anō, kua kōkūhuna he wāhi whakawhanake ki roto i te Rautaki Whakawhanake hei ara matatini hei whai mō te whakarato ratonga ki ētahi tauwāhi e tūmanakohia ai te tino nui o te tupuranga whare noho me ngā pakihī i roto i ngā rau e 30 e heke mai ana. Ka whakawhāitihia, ka whakaarotauhia ngā mahi whakamahere me ngā haumi ki ērā tauwāhi e nui rawa atu ai te whakapau raukaha whakawhanake.

Ko ngā wāhi i tautohua mō te haumi whakawhāiti puta noa i ngā tau e 30 e tū mai nei i whakatakotohia ki te whārangī 26. Kua whakaraupapatia e ai ki ētahi angawā whānui ka whakahāngai ki te Tauākī Kaupapahere ā-Motu mō te Raukaha Whakawhanake ā-Tāone.

He kohinga āhuatanga tō aua wāhi:

- he nui te raukaha e whakaratohia ana mā te Mahere Kotahitanga o Tāmaki Makaurau mō te whakawhanake kāinga me te pakihī.
- te āhei ki te whiwhi mahi huhua i te haerenga wā tika
- te āhei ki ngā pōkapū me te whatunga ikiiki rautaki i te hīkoi wā tika
- ko ngā whenua tūmatanui e taea ai te whakawhanake anō
- he raukaha pūnahahanga kei reira ināianei, kua whakamaheretia rānei
- te kaha whai takenga ā-māketete.

2. Ka tupu mātou mā te whakawhanake hapori hou

I roto i ngā tau e 30 e heke mai nei ka whakapūmautia ngā hapori hou ki ngā wāhi tāone o muri atu. Kei te tapa ēnei o te rohe tāone o Tāmaki Makaurau i tēnei wā, ā, kei ngā kāinga taiwhenua, takutai hoki. Ka whakahaeretia te roha atu ki roto i ngā takiwā kāore anō kua whakawhanakehia i roto i te Paenga i Waenga Tāone me te Taiwhenua.

Ka whakaraupapatia te whakawhanaketanga e ai ki te wā e tautuhia ana aua rohe 'hei rohe ora mō te noho me te pakihi', ā, kei roto kē te nui o te pūnahahanga¹ e hiahiatia ana.

Kua whakaraupapatia kia tuatahi ērā wāhi kua taurohea hei wāhi tāone i roto i te Mahere Kotahitanga o Tāmaki Makaurau. Ko ērā atu wāhi kua whakaraupapa tuatahitia ko ērā he iti iho ngā herenga pūnahahanga i roto. Ko ērā wāhi he nui ngā here pūnahahanga, taiao hoki kei reira ka whakaraupapatia ā muri atu i roto i te angawā 30 tau.

3. Mā mātou e hanga ngā wāhi pakihi hangore, he māmā te urutau

I a Tāmaki Makaurau e tupu ana, me whakarato raukaha rawa mō ngā pakihi hou. Ka hiahiatia pea tata ki te 263,000 ngā mahi hou ā ngā tau e 30 e tū mai nei. Ko te ara ka whāia mō te whakariterite i te tupuranga pakihi ko te whakarite kia tino pai ka taea te whakamahi o te whenua pakihi o nāianei, me te hanga hoki i ngā whenua pakihi hou i ngā wāhi kāore anō kia whakawhanakehia.

Ka whakamarutia te whenua pakihi o nāianei, ina koa ngā wāhi ahumahi hira. Ina riro atu te whenua ki whakamahinga kē, he uaua te whakakapi.

Ka whakaūngia te tauwāhi pū me te rahinga e pīrangatia ana mō ngā whenua pakihi hou i roto i ngā wāhi kāore anō kia whakawhanakehia mā roto i te whakahaere pūnahahanga, ā, ka whiwhi ratonga e ai ki te Rautaki Whakarato Whenua Tāone Ā Muri.

Mā te whakamaru i te whenua pakihi o nāianei me te whakahaere i te maha o ngā pakihi mō muri atu e whakarite i te whai wāhitanga, te hangore me te kōwhiringa i te roanga ake o te wā.

1. Hei tauria: te wai para, te wai āwhā me te ikiiki.



4. Mā mātou e whakatiki te tupuranga i ngā takiwā taiwhenua

He ranunga ngā takiwā taiwhenua o Tāmaki Makaurau o ngā taiao whakatupu, māori, whai whare hoki he kaha te whai wāhi ki te tuakiri me te āhua o Tāmaki Makaurau.

Ka mātua whakawhāitihia te tupuranga kāinga i ngā wāhi taiwhenua o Tāmaki Makaurau ki ngā tāone e whakarato ratonga ana ki te taiwhenua whānui huri rauna, ina koa ngā pona taiwhenua āpiti o Pukekohe me Warkworth. E tūmanakohia ana kia iti iho te tupuranga i ngā tāone me ngā kāinga nohinohi ake.

Ka whakawhāitihia te tupuranga tauoranga taiwhenua ki roto i ērā rohe kua taurohea hei 'oranga taiwhenua', i waho atu i ngā takiwā e tino mōrea ai te taiao me ērā he nui rawa ngā hua ohaoha.

E tūmanakohia ana te iti i te tupuranga i te rohe taiao whānui ake. Ko te āhua nei, ka pā taua tupuranga ki te whakarei i te taiao me tērā i runga i ngā pito whenua e wātea ana. Mā tērā e whakarite ka noho ora tonu ngā taiao taiwhenua, takutai, māori anō hoki i te taha o ngā mahi (pēnei i te mahi pāmu, whakatupu rākau, hī ika, tāpoi) e whakawhirinaki ana ki aua taiao, e tautoko ana hoki i te hapori ā-rohe.

Hei whakarite kia haere tonu, ki whakawhakanake tonu, ngā whakanaonga ā-taiwhenua, me āta whakaiti i te wāwāhitanga o te whenua me ngā pānga o ngā whakamahinga hou ki ērā o mua ki te whakamaru i ngā oneone tino haumako, rawe hoki e tautoko ana i ngā rawa me ngā pūnaha whakanao, tae atu ki ngā mātāpuna wai, e noho tūāpapa ana ki ngā whenua o te taiwhenua.



Te tupuranga e tūmanakohia ana – ki hea, āhea hoki

Kua whakarāpopototia i raro nei te raupapatanga o ngā wāhi whakawhanake me ngā wāhi ā-tāone mō muri atu puta noa i ngā tau e 30 e heke mai ana.

Ngā pona me ngā Wāhi Whakawhanake

	NGĀ PONA	NGĀ WĀHI WHAKAWHANAKE	
Tau Tekau 1 (2018 - 2028)	<ul style="list-style-type: none"> • Pokapū tāonenui me te tapa tāonui. • Albany* • Westgate* • Manukau 	Wā poto (2018 - 2021)	<ul style="list-style-type: none"> • Takapuna • Northcote • Avondale • New Lynn • Mt Roskill-Three Kings • Glen Innes • Tāmaki • Panmure • Ōnehunga • Ōtāhuhu • Māngere
		Wā wawaenga (2022 - 2028)	<ul style="list-style-type: none"> • Te Kūrae o Te Atatū • Henderson • Glen Eden • Newton • Morningside • St Lukes • Mt Albert • Te huanui o Dominion Road • Mt Roskill-Three Kings • Sylvia Park • Pakuranga • Māngere • Māngere ki te Rāwhiti • Papatoetoe-Hunters Corner
Wā roa (2028- 2048)		<ul style="list-style-type: none"> • Sunnynook • Birkenhead • Te Atatū ki te Tonga • Glendene • Sunnyvale • Kelston • Greenlane • Ellerslie • Highland Park • Huanui Pakuranga • Ōtara • Manurewa • Clendon • Papakura 	
Tekau Tau 2 (2028 - 2038)			
Tekau Tau 3 (2038 - 2048)			

*tae ana tētahi wāhanga nō te whaitua tāone ā muri ake nei

Ngā Wāhi Tāone o Muri me ngā kāinga taiwhenua

		NGĀ WĀHI TĀONE O MURI	NGĀ KĀINGA TAIWHENUA
He mea tūturu, he mea kirimana, he mea whakamahere rānei (2012 - 2017)		<ul style="list-style-type: none"> Ngā takiwā katoa ka taurohea hei wāhi mō ngā whare me ngā pakihi me ngā SHAs Warkworth ki te Raki Wainui ki te Rāwhiti Whenuapai Scott Point Red Hills Puhinui Kumeu Huapai Hingaia Wesley (Paerata) Belmont (Pukekohe) Drury ki te Tonga Bremner Rd (Drury ki te Uru) Bellfield Rd (Opaheke) Walters Rd (Takanini) 	<ul style="list-style-type: none"> Ngā takiwā katoa ka taurohea hei wāhi mō ngā whare me ngā pakihi me ngā SHAs Hatsfield Beach 1 Hibiscus Coast (Silverdale) Hibiscus Coast (Red Beach) Albany Village 1 Waimauku Swanson Maraetai 2 Ōruarangi 1 Clevedon Waterways Clevedon Karaka ki te Raki Kingseat Clarks Beach 1 Glenbrook Beach 1 Patumahoe
Tekau Tau 1 (2018 - 2027)	Wāhanga 1 (2018 - 2022)	<ul style="list-style-type: none"> Warkworth ki te Raki* Paerata (te toenga) Whenuapai (Wāhanga 1) Silverdale West/Dairy Flat (whenua pakihi) Drury ki te Uru Wāhanga 1* 	<ul style="list-style-type: none"> Ōruarangi 2
	Wāhanga 2 (2023 - 2027)	<ul style="list-style-type: none"> Pukekohe Cosgrave Road, Takanini 	<ul style="list-style-type: none"> Wellsford Algies Bay Albany Village 2 Helensville 1 Clarks Beach 2 Glenbrook Beach 2
Tekau Tau 2 (2028 - 2037)	Wāhanga 1 (2028 - 2032)	<ul style="list-style-type: none"> Kōuru Kumeu Huapai Warkworth ki te Tonga Whenuapai (Wāhanga 2) Drury ki te Uru (Wāhanga 2) Opaheke Drury Red Hills ki te Raki Puhinui 	<ul style="list-style-type: none"> Hatsfield Beach 2 Helensville 2 Maraetai 2
	Wāhanga 2 (2033 - 2037)	<ul style="list-style-type: none"> Silverdale Dairy Flat (te toenga) Wainui ki te Rāwhiti (te toenga) Warkworth Raki-mā-rāwhiti 	
Tekau Tau 3 (2038 - 2047)	Wāhanga 1 (2038 - 2042)		
	Wāhanga 2 (2043 - 2047)	<ul style="list-style-type: none"> Takanini+ Ngā takiwā tipu kāore anō kia whakaritea 	

* Drury ki te Uru (Wāhanga 1) me te whakawhanaketanga o Warkworth ki te Raki e reri ana hei te 2022

+ He maha rawa ngā waipuke me ngā herenga - me ketuketū ā-hangarau



Te pūnahahanga o Tāmaki Makaurau

He pānga wā roa tō te haumi ki te pūnahahanga mō te anamata o Tāmaki Makaurau, ā, ka whai wāhi ki te āhua e mahi ai mō ngā whakatupuranga o muri. Mā te taupori me te tupuranga ohaoha e tūmanakohia ana i Tāmaki Makaurau i ngā tau e 30 e tū mai nei e whakaputa ētahi wero e pā ana ki te pūnahahanga me ngā whai wāhitanga, tae atu ki:

- te ruruku i te haumi me te whakamahere kia taea ai te tupuranga
- te whakapai ake i te mahinga o te pūnahahanga o Tāmaki Makaurau
- te hanga i te whatunga pūnahahanga toitū.



E awe ana ngā whatunga pūnahanga rautaki o Tāmaki Makaurau i te wāhi me te wā e puta ai te tupuranga nui ā-tāone, ina koa i ngā wāhi tāone o muri atu. E whakarato ana aua whatunga rautaki i ngā ratonga tōpū waiwai kei roto ko te ikiiki tūmatanui, ngā rori, te wai me te wai para.

Ko te tikanga whakarite ai ngā kaupapa ki te whakaroha, whakanui rānei i te raukaha i ngā whatunga rautaki i te haumitanga tūmatanui rahi, ā, he roa te wā e hiahiatia ana mō te whakamahere me te hanga. E whakarato ana te Rautaki Pūnahanga mō Tāmaki Makaurau mō te 30 tau i roto i te tahua 10-tau i ētahi anō wero pūnahanga, urupare me ngā haumi ka whakamaheretia.



TE AUHAHA I TE MAHERE

Ko tō mātou mahi tahi me ngā kaiwhaipānga, hāpori, whakahaere mana whenua me te kāwanatanga matua he mea hira i te whakawhanaketanga o te mahere nei. Kua kōrero mai koutou i ō koutou whakaaro e pā ana ki te mea hira mō Tāmaki Makaurau i ēnei tau e 30 e tū mai nei, ā, kua auaha tēnei i ngā putanga me ngā ahunga i roto i te mahere.

E toru ngā wāhanga o te whai wāhi:

- **Mei / Hune 2017** - ko te whai wāhitanga moata i whakamōhio i te anga rautaki
- **Hūrae / Noema** - ko te whai wāhitanga heipū kaiwhaipānga i whakamōhio i te mahere hukihuki
- **Pēpuere / Maehe 2018** - ko te whai wāhitanga tūmatanui i whakamōhio i te mahere whakamutunga

Nā tēnei ara i whakarite ai ko te Mahere Mō Tāmaki Makaurau 2050 he mahere i whakawhanaketia e ngā tāngata katoa o Tāmaki Makaurau, mō Tāmaki Makaurau. Ka whakawhirinaki tana angitu ki ngā kaiwhaipānga me ngā hoa e mārāma ana ki te takune, e mahi tahi ana hoki ki te whakapuaki i te mahere.

Ko te mahere whakamutunga te tino hua i puta mai ai i ngā mahi me te whai wāhitanga korahi mō ngā marama maha kua pahure ake nei. E pīrangī ana mātou ki te tuku mihi ki ngā tāngata katoa kua tuku urupare mai me te āwhina kia whakarite ko te Mahere Mō Tāmaki Makaurau te whakatinanatanga o te Tāmaki Makaurau e pīrangī ana mātou ā muri ake nei.



Mahere Mō Tāmaki Makaurau 2050

Te ara ki te whai wāhitanga

WĀHANGA 1 - WHAI WĀHITANGA HEIPŪ MOATA

Mei – Hune 2017

Ka arotahitia tēnei whai wāhitanga ki te tohu i ngā tino wero me ngā whai wāhitanga kei te aroaro o Tāmaki Makaurau.

Neke atu i te 30 ngā hui/ takunetanga ki ngā kaiwhaipānga me ngā hapori, ā, i tae mai ngā urupare e 850.

Nā te urupare nō tēnei wāhanga o te whai wāhitanga i puta mai ai te whakawhanaketanga o te anga rautaki hukihuki.

WĀHANGA 2 - WHAI WĀHITANGA HEIPŪ

Hūrae – Noema 2017

Ka whakauru tēnei whai wāhitanga i ngā hoa me ngā kaiwhaipānga ki te whakawhanaketanga o te mahere hukihuki mō Tāmaki Makaurau ki te taumata āmiki, hangarau anō hoki.

Ko ngā tūmomo whai wāhitanga ko ngā papamahi, ngā hui me ngā tuhinga i tukuna mai.

Nā te urupare nō tēnei wāhanga o te whai wāhitanga i whakamōhio ai te whakareringa me te whakawhanaketanga o te Mahere Hukihuki mō Tāmaki Makaurau 2050.

WĀHANGA 3 - WHAKAWHITIWHITI WHAKAARO TŪMATANUI MŌ TE MAHERE HUKIHUKI MŌ TĀMAKI MAKĀURAU 2050

Pēpuere – Maehe 2018

Whakawhitiwhiti whakaaro tūmatanui mō te Mahere hukihuki mō Tāmaki Makaurau 2050.

I tū tahi te whakawhitiwhiti whakaaro ōkawa me te tahua 10-tau i te Pēpuere me te Maehe 2018.

Ko te tini me te mano i manawa reka ki te mahere, neke atu i te 18,700 ngā tāpaetanga tuhi, ā, neke atu i te 5,000 ngā tāngata i tae ā-tinana ki ngā tūmomo hui.

Nā te urupare nō tēnei whai wāhitanga i whakamōhio mai ai te Mahere whakamutunga mō Tāmaki Makaurau 2050.

"Ko te kaha o te manawa reka ki te Mahere mō Tāmaki Makaurau e whakaatu ana i te whai wāhitanga o ngā tāngata katoa o Tāmaki Makaurau ki te anamata o Tāmaki Makaurau", Kaikaunihera Chris Darby Te Hea o te Kōmiti Whakamahaere.

